

**Imarsiornerup isumannaatsuuunissaa pillugu inatsisit allannguutaasa Kalaallit
Nunaannut atuutilersinnerinut peqqusummut Namminersorlutik Oqartussat
oqaaseqaatissaat pillugu Inatsisartut aalajangiiffigisassaattut siunnersuut
(Ineqarnermut, Attaveqarnermut Angallannermullu Naalakkersuisoq)**

pillugu

Sanaartornermut Avatangiisinullu ataatsimiititaliap

ILASSUTITUT ISUMALIUTISSIISUTAA.

Siunnersuutip aappassaaneerneqarnerani saqqummiunneqartoq.

Ataatsimiititaliap suliarinninnerani ilaasortat uku peqataapput:

Inatsisartunut ilaasortaq Naaja Nathanielsen, Inuit Ataqatigiit, Siulittaasoq
 Inatsisartunut ilaasortaq Justus Hansen, Demokraatit, Siulittaasup tullia
 Inatsisartunut ilaasortaq Storm Ludvigsen, Inuit Ataqatigiit
 Inatsisartunut ilaasortaq Knud Fleischer, Kattusseqatigiit Partiiat
 Inatsisartunut ilaasortaq Malik Berthelsen, Siumut
 Inatsisartunut ilaasortaq Anders Olsen, Siumut
 Inatsisartunut ilaasortaq Kim Kielsen, Siumut

Inatsisartut Suleriaasianni § 15 naapertorlugu aalajangiiffigisassatut siunnersuut aappassaaneerneqarnerami ataatsimiititaliamut innersunneqaqqippoq.
 Innersunneqaqqinneranut tunuliaquataavoq, Naalakkersuisut akissumminni allassimammassuk, “§ 29a, imm. 6, oqaaseqatigiit siullit peerneqarnissaat” Naalakkersuisut peqqusummut oqaaseqaammut allassagaat ataatsimiititaliaq isumaqatigineqanngimmat. Maleruagassanut allannguutissatut pilersaarutigineqartut kissaatigisamik sunniuteqanngitsut paasinarsissappat, imaatigut angalanermi promillemut killissarititaasoq pillugu maleruagassani inuit pineqartut amerlinissaannut ingerlaannaq periarfissaqarnissaq Naalakkersuisut kissaatigisimavaat. Ataatsimiititaliap ilassutitut isumaliutissiisummik tunniussinissaat siunertalarugu, Ataatsimiititaliami amerlanerussuteqartut siunnersuutip innersunneqaqqinissa kissaatigaat.

Ataatsimiititaliap siunnersuummik suliaqarnera

Siullermeerereernerup kingorna Ineqarnermut, Attaveqarnermut Angallannermullu Naalakkersuisumit Inatsisartut arlalinnik allagarsipput. Allagarsiat tunuliaqutaralugit

sunngiffimmi angallatit atortakkit siunissami imigassartorsimalluni imaani angalanermut maleruagassanut aamma ilaatinneqassasut Naalakkersuisut taamaallaat sulissutigigaat Ataatsimiititaliap ersarissumik paasisorivaa.

Aammattaaq Ataatsimiititaliap paasinninera malillugu, Inatsisartut aamma Naalakkersuisut isumaqatigiipput imaatigut angalanermi promillemut killissarititaasoq pillugu maleruagassani inuit pineqartut amerlinissaannut ilaasut ilaatinneqassanngitsut. Taamaattumik Imarsisornermut Aqutsisoqarfip oqariartuuta inuit pineqartut amerlineqannginnissaannik Inatsisartut aalajangissagaluarpata, tamatuma peqqussummut oqaaseqaatini allassimanissa, kiisalu § 29, imm. 1, oqaaseqatigiit siullit aalajangersakkami ilaatinneqannginnissaannik allassimanissa naleqquttuussasoq aappassaaneerinermut Ataatsimiititaliap isumaliutissiisummini aamma isumaqatigaa.

Inatsisartut Kalaallit Nunaanni imarsiornerup isumannaatsuunissa pillugu maleruagassanut atatillugu Inatsisartut maleruagassanik sunik aalajangiisanersut pillugit Imarsiornermut Aqutsisoqarfik arlaannaatigulluunniit isummersorsimanngitsoq imaluunniit inassuteqarsimanngitsoq soorunami Ataatsimiititaliap ilisimavaa.

Isumasioqatigiineq

Siunnersuutip Ataatsimiititaliami suliarineqarneranut atatillugu Ineqarnermut, Attaveqarnermut Angallannermullu Naalakkersuisoq Ataatsimiititaliap isumasioqatigisimavaa. Isumasioqatigiinnermut aggersaassutip aamma Naalakkersuisunut ilaasortap oqaatigisassaanut allattukkat assilineqarneri isumaliutissiisummut uunga **ilanngussaq 1**-itut tapiliunneqarput.

Isumasioqatigiinnermi Ataatsimiititaliap Naalakkersuisunut ilaasortaq aperaa, inatsisitigut aaqqissuussineq periarfissaanersoq, taamaalilluni piginnaatitsilluni aalajangersagaq § 29 a, imm. 6-imi oqaaseqatigiit siullit tamakkerlugit ilanngunneqarlutik, peqatigitillugulu § 29 a, imm. 6-imi oqaaseqatigiit siullerni maleruagassat timitalerneqarnissaat Inatsisartunit akuerineqarnissaa piumasarineqarluni. Ineqarnermut, Attaveqarnermut Angallannermullu Naalakkersuisup taavaa, inatsisitigut taama aaqqissuussineq periarfissaanersoq misissorumallugu, kingusinnerusukkullu Ataatsimiititaliaq tamanna pillugu ilisimatillugu.

Ulloq 21. maj 2012 Ataatsimiititaliaq Ineqarnermut, Attaveqarnermut Angallannermullu Naalakkersuisumit allagarsimavoq, tassanilu Naalakkersuisut Siulittaasuata Naalakkersuisoqarfiani Inatsisilerinermi immikkoortortamit siuliani ajornartorsiut taasaq pillugu inatsisitigut naliliineq tapiliunneqarsimavoq. Allagaq isumaliutissiisummut uunga **ilanngussaq 2**-tut tapiliunneqarpoq. Taamatut inatsisitigut pituttuisumik aaqqissuussineq periarfissaanngitsoq Inatsisilerinermi immikkoortortap nalileraa allakkami takuneqarsinnaavoq.

Ataatsimiititaliap suliaqarnerata nalaani paasissutissat pissarsiarineqartut ataatsimut nalilereerlugit, aappassaaneerinermut isumaliutissiisummi inassuteqaatit aalajangiusimallugit Ataatsimiititaliap oqaatigissavaa. Taamaalilluni Ataatsimiititaliaq isumaqarpoq peqqusummut Naalakkersuisut oqaaseqaatissaanni allassimassasoq § 29 a imm. 6-mi oqaaseqatigiit siullit ilaatinneqassanngitsut, tassa ataatsimiititaliaq isumaqarmat inuit pineqartut pillugit siunissami allannguutaajumaartut Inatsisartunut saqqummiunneqassasut.

Ataatsimiititaliap inassutai

Ataatsimiititaliap isumaqatigiittup siunnersuutip akuerineqarnissaa inassutigaa, taamaattorli peqqusummut oqaaseqaatini allassimassasoq § 29 a, imm. 6-imi oqaaseqatigiit siullit ilaassanngitsut.

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappassaaniigassanngortippaa.

Naaja Nathanielsen,
Siulittaasoq

Kim Kielsen

Justus Hansen

Malik Berthelsen

Storm Ludvigsen

Anders Olsen

Knud Fleischer